




SÁMEDIGGI

**Sierra njuolggadusat
bearráigeahččanlávdegotti
ovddasvástádus- ja bargosuorgái**

Maŋimuš rievdadusat dahkkon 06.06.2013



§ 1 Sámedikki bearráigeahččanlávdegoddi

Bearráigeahččanlávdegoddi organiseren, bargamušat ja ovddasvástádus čilgejuvvo Sámedikki čoahkkinnortne § 14 ja § 15.

§ 2 Bearráigeahččanlávdegoddi bargamušat

Bearráigeahččanlávdegoddi galgá fágalaš vuoduin doaimmahit parlamentáralaš bearráigeahču ja stivrenberráigeahču iskamiin ja čielggademiin áššebeliid, árvvoštallat daid áhahuvvon eavttuid ja ortnegiid ektui, ja čujuhit vejolaš boasttuvuođaid ja váilevašvuodaid.

Bearráigeahččanlávdegoddi dahje sis geasa Bearráigeahččanlávdegoddi lea fápmudan válddi, lea dievaslaš vuogiatvuotta beassat oaidnit Sámedikki dokumeanttaid, rapportaid ja sullasaččaid.

§ 3 Bearráigeahččanlávdegoddi bargovuogit

Bearráigeahččanlávdegoddi galgá barggustis:

1. Láhčit saji rabas digaštallamii gos moaitámuš čilgejuvvo ja vuodustuvvo.
2. Láhčit saji digaštallamii Sámedikki orgánain
3. Geahččalit garvit bellodatpolitihkalaš beliid.

Bearráigeahččanlávdegoddi galgá álo árvvoštallat bearráigeahččanbarggu viidodaga daid vejolašvuodaid ektui ahte gávdnat boasttuvuođaid ja váilevašvuodaid.

Iskkademiid čađaheapmi bearráigeahču ja gulaskuddamiid várás sáhtá dušše čađahit dain áššiin, mat leat mearriduvvon galget formálalaččat meannuduvvot Bearráigeahččanlávdegoddi. Iskkademiid čađaheami oktavuodas galgá ráhkaduvvon mandáhta mas bargamuš boahá čielgasit ovdan.

§ 4 Bearráigeahččanlávdegoddi áššiid ovddideapmi

Bearráigeahččanlávdegoddi sáhtá earenoamáš áššiin ovddidit mearrádusevttohusa sierra áššin dievasčoahkkimii. Muđui áššit ovddiduvvojit jahkediedáhusa bokte, gč § 5 nr. 1. Mearrádusevttohus galgá sáddejuvvot áirasiidda dan áigemearis mii lea mearriduvvon čoahkkinnortnega paragrafas 21.

§ 5 Bearráigeahččanlávdegoddi jahkediedáhus

Bearráigeahččanlávdegoddi galgá juohke jagi ráhkadit jahkediedáhusa maid ovddida dievasčoahkkimii. jahkediedáhus galgá sáddejuvvot áirasiidda dan áigemearis mii lea mearriduvvon čoahkkinnortnega paragrafas 21, ja das galget čuovvovaš fáttát leat mielde:

1. Konkrehta áššit maid Bearráigeahččanlávdegoddi lea meannudan, oktan Bearráigeahččanlávdegoddi mearrádusevttohusain dakkár áššiin mat eai leat leamaš ovddiduvvon sierra áššin dievasčoahkkimii, gč § 4.
2. Lisat mii čájeha dollojuvvon čoahkkimiid ja čađahuvvon bargguid.
3. Mearkkašumit Sámedikki jahkerekhetdollui.
4. Mearkkašumit Sámediggeráđi čoahkkingirjiide, dás maiddái doarjagiidda ja juolludemiide.
5. Mearkkašumit Sámedikki váiddalávdegoddi čoahkkingirjiide.
6. Mearkkašumit riikarevišuvnna rapportaide.
7. Vejolaš ávžžuhusat olggobealde bearráigeahččan- ja revišuvdnaorgánaide ahte lagabui geahčadit dihto beliid.
8. Plána das maid Bearráigeahččanlávdegoddi áigu lagabui bearráigeahččat boahhtevas jagi .
9. Daid iskkademiid válddahus mat leat čađahuvvon § 6 vuodul.

§ 6 Bearráigeahččanlávdegotti mearrádusat

Daid áššiid oktavuodas, maidda ii gusto § 5, mearrida Bearráigeahččanlávdegoddi čoahkkimis go áigu:

1. Čađahit ovdaiskkademiid.
2. Formálalaččat meannudišgoahit ášši.
3. Čađahit gulaskuddamiid.

Bearráigeahččanlávdegoddi sáhhtá maiddá dahkat mearrádusa:

1. Doallat dárbbaslaš čoahkkimiid
2. Bidjat johtui iskkademiid mat mielddisbuktet bálvalusaid oastima.

Mearrádusat dahkkojuvvot dábálaš eanetloguin. Sihke evttohus ja Bearráigeahččanlávdegotti mearrádus galget čállojuvvot beavdegirjái.

§ 7 Bearráigeahččanlávdegotti iskkadeamit

Ovdalgo Bearráigeahččanlávdegoddi čađaha iskkadeami, de dieđihuvvo Sámediggeráđđi dahje vejolaččat Dievasčoahkkinjodihangoddi.

Bearráigeahččanlávdegoddi galgá geahččat bearrái ahte ášši lea čuvgehuvvon nu bures go vejolaš. Bearráigeahččanlávdegoddi háhká daid dieđuid maid dat atná deatalažžan.

Čilgehusat mat leat addojuvvon Bearráigeahččanlávdegoddái, galget sihkkarastojuvvot duhtadeaddji láhkai.

Earret go jus Bearráigeahččanlávdegoddi mearrida eará iešguđet ássis, de eai leat dat čoahkkimat ja ságastallamat mat čađahuvvot oassin iskkadeamis, rahpasat álbmogii.

Iskkadeapmi loahpahuvvo raporttain. Raporta lea almmolaš ja das galgá leat válddahuvvon dat ášši mii lea čielggaduvvon, ja das galgá boahit ovdan mo Bearráigeahččanlávdegoddi lea árvoštallan ášši.

§ 8 Bearráigeahččanlávdegotti gulaskuddamat

Bearráigeahččanlávdegoddi sáhhtá čađahit gulaskuddamiid oassin iskkadeamis § 7 vuođul. Son guhte gohččojuvvo gulaskuddamii, mearrida ieš áigu go vástidit bearráigeahččanlávdegotti gažaldahkii.

Earret go jus eará lea mearriduvvon, de galgá gulaskuddan leat rabas. Bearráigeahččanlávdegoddi mearrida dábálaš eanetloguin galgá go gulaskuddan ollásit dahje muhtun muddui čađahuvvot gitta uvssaid duohken. Bearráigeahččanlávdegoddi sáhhtá dušše gitta uvssaid duohken váldit vuostái jávohisvuođageatnegas dieđuid.

§ 9 Sin vuoigatvuođat, geaidda ášši guoská

Bearráigeahččanlávdegoddi galgá barggustis bearráigeahččat ahte fuolahuvvot sin vuoigatvuođat, geaidda ášši guoská. Dajaldagain “sii, geaidda ášši guoská” oaivvilduvvo olbmot, organisašuvnnat dahje ovtastusat geaidda Bearráigeahččanlávdegotti bargu guoská.

Bearráigeahččanlávdegoddi galgá láchit dilálašvuođa dasa ahte sii, geaidda ášši guoská, ožžot vejolašvuođa ovddidit cealkámuša.

Sii, geaidda ášši guoská, galget ávžžuhusa vuođul oažžut daid dieđuid main lea mearkkašupmi sin iežasat dillái, earret go jus dakkár dieđut sáhhtet vahágahttit iskkadeami dahje goaimmát beali.

Ovdalgo Bearráigeahččanlávdegoddi geige raporttas, de galgá juohkehaš geasa iskkadeapmi guoská, oažžut dieđu das mo iskkadeami boadus guoská sutnje.

Sis, geaidda ášši guoská, lea vuoigatvuohta oažžut veahki iskkadeami buot muttuin.

§ 10 Jávohisvuođabággu

Hálddašanlága njuolggadusat jávohisvuođabákku birra gustojit seamma láhkai Bearráigeahččanlávdegotti lahtuide. Jávohisvuođabággu gusto maiddái manjá go iskkadeapmi lea loahpahuvvon.

Juohkehažžii gii čađaha barggu Bearráigeahččanlávdegotti ovddas dahje eará láhkai oažžu dieđuid lávdegottis, gusto jávohisvuođabággu seamma láhkai go Bearráigeahččanlávdegotti lahtuide.

Go Bearráigeahččanlávdegoddi čađaha iskkademiid, de sáhhtá iskkadeami mandáhtas mearriduvvot ahte láhkageatnegahttojuvvon jávohisvuođabággu, lagabui mearriduvvon viidodagas, ii galgga gustot sutnje gii addá čilgehusa dahje eará láhkai addá dieđuid Bearráigeahččanlávdegoddái.

